

www.facebook.com/Mohamed.M.khirallah

محمد ممدوح خيرالله

ڪوابيس مملة

أوجاع بالعامية المصرية

كوابيس مملة - ديوان شعر بالعامية

تأليف: محمد ممدوح خيرالله

دار الفيروز للنشر والترجمة والتوزيع

رقم إيداع: 2015/27039

ترقيم دولي: 8-19-6472-977



7 شارع سيف النصر - بنها الجديدة

Dar_al-fairouz@hotmail.com Facebook: dar.alfairouz ت: 0133212547 01022622814

www.fairouzaty.com

جميع حقوق الطبع والنشر محفوظة للناشر فقط وغير مسموح بإعادة نشر أو إنتاج الكتاب أو أى جزء منه أو تخزينه على أجهزة استرجاع أو استرداد أو تسجيله على أي نحو بدون أخذ موافقة كتابية مسبقة من الناشر



أوجاع بالعامية المصرية

الإهداء..

إلى زوجتى..

"بعض الأشياء أجمل عندما أراها بعينك، بلغتك، بصوتك، بقلبك، بل كل الأشياء جميلة عندما تمرريها اليًّ".

أتذكر تلك الجملة جيدًا وقتما كتبتها لكِ، شكرًا لأنكِ كنتى سببًا في أن تمررى اليَّ الحياة مرة أخرى، بكل ما ملكتى، وكنتى سببًا في أن أنتظر الغد، لعل في الغد فرحة، وفي الفرحة دائمًا ما تكون هناك حياة، لكنك أعطيتنى الحياة والفرحة معًا.

محمد خير الله

كان طريقنا لسه واحد

كان طريقنا.. لسه واحد

م المحطة لمدرستكم

من بلدنا لحد بيتكم

كان بياخد منى شوقى..

غصب عنى يوديهولك

كنت أجيلك..

قبل شمس اليوم ما تطلع

وإنتي فايته.. كنت بفرح

كان في نفسي مره أصَّرح

إن حبك.. عبى صدري..١

في الطابور الصبح بدري

كان ينادي الميكروفون

تحيا مصر

كنت أرد بأعلى صوت

ياللي واقفه لحد ما أدخل جوا فصلي

إنتي ليا

إنتي كل الدنيا ديا

تحيا إنتي.. مصر إنتي

والطابور مفروض علينا

وإنتي وحدك بس..

مفروضه عليا..!

واما كنتى بتبقى راجعه

أرمى نفسي جنب واحد..

مش بحبه

بس قاعد جنب منه شباكين

كنت أبص عليكي منهم

جنب بيتكم كنت أعدى علشان أشوفك

وإنتي داخله.. وإنتي خارجه

ما إنتي عارفه قد إيه لازم أشوفك كل يوم..١

بعد عشقى...

إنتظرتك يوم تحني

وألقى حضنك بيناديني في وقت خوفي

إتخدعت بنظرة منك

علقتني بحبل دايب

كنت خايب..١

ولعذابي كنت حابب

شُفت منك كل حاجة وقُلت؛

جايز...

الحقيقه تبان وتوضح

كنت بجمع

وإنتي قلبك كان بيطرح

واما جيتي وقولتي إنك

مش هينفع تبقي جنبي

كان ضروري ألِم روحي.. وأصد شوقي

وأصد قلبي

كان ضروري أحس إنك مش نهاية

مش حكاية ع الورق سابت قصايد..

أو رسايل..

الحساب مش بس جمع

والعيون مش بس دمع

كل يوم بيمر.. بتقرب نهاية

م المشاعر قلبي رُص وقال:

كفاية ..!

عن إحساسك

عن إحساسك..

بالعمر بيجري قصادك

وبيسبق حتى سمار الشُعره

اللي حرقها الحِمل

فاتحول لونها في راسك.. للأبيض

مع إن اللون دا بعيد جدًا

عن واقع حالك..١

عن إحساسك..

اللي الوقت بيستخسر مره

يفكر روحك بيه

فتعدي سنينك زي الثورة ماعدت

وفي غمضة عين

تلاقيك مش فاكر إن إمبارح

كان عمرك لسه

معداش العشرين

وإنك كنت بتحلم..

نفس الحلم الحالي..!

الوقت..

يجوز كان سنك سابقة في يوم

وعيونك دي اللي إمبارح

كانت تقدر تلمح بُكرة بأسهل نظرة

مابقتش بتلمح غير فنجان القهوة.. طشاش

إتغير كل ما فيك

مش فاضل منك

غير نفس الحِمل المنقوش فوق الخدين

ونفس الحلم اللي استنيته سنين

ومعاده مجاش..١

الرد من غير صوت

بفتكر..

فرحة عيونك

وأنت شايف فرحتي

وافتكر لحظة رجوعك في العصارى

فاتح دراعك حضن..

كاسر لهفتى

وافتكر.. إنك كتير

مالقتش صاحب يفهمك قدي

يخلف معاك الحظ..

ألقاك بتوعدني

وتسيب بيبان..

دايمًا يجيب الشمس قبل الصبح باب

ويجيبني باب

والحظ كان في إيديك شيطان

فاتت سنينك والساعات

خطاويك سككها إتبدلت عن ناحيتي

وأنا سابقه سني دمعتي

على إيه ملامح طفل تتغير..

على حلم كان مولود في كفّك

مات معاك..

على صوت بينده بالأسامي

معدش مسموع في الطريق

كان فيه قدر مكتوب

ووقت بيسرقك

علشان ما تفضل في الحياة وفي الناس

تتوزع التفاصيل وبعد يومين يادوب

ناس نسيتك..

وباقى حبة ناس

خلصت حكاوي المعجزات

لو لسه فاضل منها شوية حاجات

أنا كنت قُلت بعلو صوتي

ياريت تعود

وفتحت صفحة جديدة

من دفتر جدید

وعملت نفسي من جديد مولود

وتجيب قلم

وأنا أجيب كتاب

عودني تاني على القراية..

وعلى الكتابة.. وعلى الحساب

إبنك بليد الفصل

والدنيا "الأويلة"..

على طول تنجح نفسها

يآه.. كان زمان بنجيب عاليها واطيها

نوصل قرارها ألف مره في ليلة

وتسيب ألم

وأنا أسيب عيوني تبص م الشباك عليك

يمكن تكون حنيت وجاي تزورنا

وتقول وصيه ما قولتهاش

وتشوفني بعد ما سني قرب يوصلك

وتشوف صورناع الحيطان

موجود معانا وأنت مش موجود

حلو العتاب بالصوت

والرد من غير صوت..!

كُتر الوجع.. بيعلم الرحمة

كُتر الوجع.. بيعلم الرحمة

ولكل قاعدة.. شواذ

أعرف حبيبة من يومين

كانت بتحلم بالسفر في عيوني.. عُمر

واليوم..

بتمشىع الجسد

شبه اللي مشيوا في الميدان

فوق صورة لرئيس.. "قد طغي"..١

مين اللي قال:

كُتر الوجع.. بيعلم الرحمة

هذا الغبي..

لو كان عرف إن في القسوة حياة

مكنش مات..

علشان بيغلط كل مرة في إختياره

ومكنش شاف شكله

وهو صعبان ع الصحاب

لو كان حجر..

كان وفر الدمعة

كان اكتفى بضحكة..١

صاحبي اللي عارف كل شئ عني

قالى إن لو نصدق.. هننجى

قالى إن في الدنيا كتير

لسه قلوبهم كالملايكة

صاحبي اللي آمن طول حياته بالأمل

وبأن لسه الخير كتير

وبناس منعرفهمش.. لكن

حس زيي بإنهم.. ناس مننا

ساعة ما شافني بحبس الدمعة

ورا كلمة "يارب"

قالى.. خلاص

كُتر الوجع.. لازم يعلمنا القساوة... ا

الأن.. آمنا

إن اللي عايش فينا

لو ميت كان أحسن

وإن القلوب الطيبة ملهاش مكان

وإن الزمان..

هو اللي خلانا عبيد

علشان مشينا عكس كل الناس

وسبنا في قلوبنا أمل

يمكن نقابل حد يشبهنا..

كتر الوجع.. قد علمه الرحمة..!

الأوضة

جوه أربع جدران إتغطوا بقش الرز

وعيدان البوص المتشبكه بحبال

موجود..

في الأوضة

مع كنبة

ملهاش غير رجلين والحيطة المليانة شروخ..

تسندها

مرميه عليها الشلته المتكبسه بهدوم

مبقتش مقاسى

وشوية قصاقيص.. وأوراق

مكتوبة عليهم حبة كلمات

مرصوصة وعامله قصيدة

إتحشرت هيا كمان وبقت منسيه

وسرير..

ناقص كام لوح

سايب تحت المرتبة مسافات

بتدلدل منها وتكسر ضهر النايم فوقها

ولحاف بيشوك

علشان خارج من مصنع مكتوب ع الكيسه بتاعته

صنع لسد الخانة وعدم الحاجة لقولة (آهـ) م البرد" وحكاية التسريحة حكاية

مكتوبة في قايمة ست الكل ومستولى عليها

والدرج بتاعها المقلوب مقلب

لعيدان كبريت محروقه

وسجاير مشروبه

من عمر بدایتی

في ممارسة عادة التدخين السري

بيني وبين صدري

والمكتب..

اللى مضيق حجم الأوضة بحجمه

أصبح.. ملهوش لزمه

أصل أحلام العقل الباطن

طالها الفجر وحر الشمس.. وعرقت

دابت من كُتر الترصيص

جوه أدراجه المتسرطنة بالسوس

السوس..

كان بيسن عليها سنانه

قبل ما يبداء عمله اليومي

أول.. بأول

والكرسي كمان مبقاش بيشيلني

فاتحط عليه الراديو اللى مابيعلاش

غيرنص الليل

على صوت مذعيين

بيذيعوا في أخبار تقهرني

وأنا دايمًا..

بادیها طناش في طناش

يطلع لي الناتج ساعتين نوم

بتاخدني الكوابيس جواهم

متشعلق في حبال.. وسفوح

أصل أنا مخلوق

بتتقل..

لكن...

ملیاش روح....۱

كوابيس مملة

1

كان لسه عمرى بيبتدي

والعالم المشهود قصادي

كان مجرد فجر نوره بيتفرد

على كل دار

أنا كنت حافظ جملتين إتنين.. وبس

في الدنيا جنة

والأخره مفيهاش إلا نار...!

عارف أنت

لما تبقى الصورة واضحة

وأنت مش قابل... تشوفها

لما تبقى الناس سيرتها عنها جارحة

وأنت مقتول من سكوتها

لما يبقى مُباح فراقك

وأنت تايه في إشتياقك

نص عمرك

ولا عمرك كله ضايع..؟

لسه تایه..؟

هيا بتمارس حياتها...!

كان لسه طفل بيتولد

سامع صراخه

إفتكرتك وإنتي بتقولي.. سامحني

أنا كنت شايفِك وقتها.. من غير ذنوب

مولوده طازه ودمعتك نفس البكاء

أنا نفسي من تاني أتولد

هانزل أعيط

لأجل أتوب...١

ياريتك.. تصحى لثواني

اقولك.. تصبحى على خير

وتبقى تنامى من تاني...!

مجرد وجودي في حياتك

هزيمة

مجرد خروجك من القلب

إنتصار

مجرد رجوعي في قراري

تحدي

مجرد ما أقابلك

هاسيب لك حياتك

وأسيب لك حياتي

وأسيبك...١

كانت الشمس إتحادي

والنجوم والليل قصايدي

وإنتي أم قصايدي والشعر وهوايتي

حب عمر بحاله

حلم..

فاكره غناويا لعنيكي ؟

لمستي لخدك وجسمك

فاكره إحساس السعادة ؟

أحلي حاجة إن إنتي فاكره

وإني مش فاكر زياده...!

مش دايمًا لما بتوحشنا

بنسيب اللي شاغلنا ونمشيلك سكة

عشان نفتكرك...!

ماهو أصل الحي.. زي الميت

لاتنين خارج حدوتة عقل الناس

الهم الأكبر، مش هم الصُحبة

ولا عمره يا صاحبي هايبقى لواحد زيي

كان زيك يوم

الهم الأكبرفي بلدنا.. هم اللقمة

والعالم أصلاً دلوقتي

بيوزع في الملكوت الهم.. هدوم...!

زی عقرب ساعة

كل ما بقرب ثواني..

تبعدك عنى الدقايق

كل ما بقرب دقيقة..

تخطفك مني الساعات

فارجع أمشيلك خطاويا في ثبات

يسرقك بُكره اللي كان شايل حاجات

معرفتهاش...١

ماسبتش غير.. صورة

وضحكة من قلبها

وفرحة مكسور*ه*

ماسبتش غير.. جرحي

وقالت لي معذوره

وأنا برده صدقتها...١

أخرتها ايه..؟

لو عمري كله.. عشتهولك

قلبي الضعيف.. وضبتهولك

أخرتها ايه..؟

هتعاندي برده العيشة فيه...١

المشكلة..

مش دمعة نزلت فوق خدودها.. والسلام

المشكلة..

في هذا الوجع

إزاي قدر يغسل ذنوبها

بدون كلام...١

بيوحشني الشتاء.. وياك

ويوحشني دفا حضنك

وبتعدي الفصول بالطول

وأنا مبطولش غير إسمك

عشان الدنيا دي بوشين

أنا موجود

وروحك.. وسط ناس تانيين...!

زمان كان الفراق أصعب

زمان كان البكاء عنوان

وكان الحزن بيخيم على القلبين

لكنه الحب.. بات مغلوب

زمان كان الفراق بعذاب

ودلوقتي

مفيش قلبين تلاقي الحب دوبهم

زمان كان الفراق بحساب

ودلوقتى الفراق نكتة

يقولها اتنين لبعضيهم

وتعجبهم...١

مش كل ناسك في البلد.. عابد

ولا كل صحبة تهون المشاوير

كل القلوب وشين.. وبتعاند

حزنك لقلبك

مش قلوب الغير...!

ماملكش غير قلبي

وحياة وهبها لك

وإيدين بتعلى للسما وتدعى.. ربنا يخليكي

ومافيش وطن ليا

ولا بيت أعيش جواه

وطنى الوحيد حضنك

وبيتي هو عنيكي

ولا فيه بإيدى قرار

ولا حل ولا خيارات

أنا في إنتظار قدري

والإختيار ليكى...!

ماسييناش ذكرى للقصة

لكنا سيبنا تفاصيلها على الطرقات

على السكك اللي دابت من خطاوينا

وفوق الخد.. ودموعنا.. وفي المترو

ووسط حروف كتبنا منها دي الجوابات

أنا وإنتى قتلنا الذكري جوانا

لكنا نسينا نمحيها

من الشجر اللي شايل لسه أسامينا

وقلب وسهم

وسيبنا الليل يبدل كام حقيقة بوهم

ونسينا مشاعرنا.. مشاعرنا

بأول حضن في السيما

وأول بوسة مكسوفة تسيب خدك

وأول عيد بيحضرنا

ويبقى للفسح قيمة

كراسي دسوق.. وشط البحر والقلعة

وكام صورة على استانلي

ماتستنى الزمن ينسى يا بنت الإيه

يا فاكرة القلب مخزن للتراب والنار

وفاكرة القلب اوضة ودار

لأيام هيا اللي عاشتنا ومعشنهاش...!

إمبارح..

أنا شفتك في الحلم

على إيدك بنت بتشبه لك

وبتحضني كف النونو بقلبك

وبتضحكي بشويش من فرحك

إمبارح..

أنا كنت في حلم

وصحيت وأنا روحي بتنده لك...!

أنا بسمعك

وإنتي بتاخدي من القصايد

اللي مكتوبة في عيونك

وتدندني قدام مرايتك..

"بعشقك"

وبتلضمي بغنوة لنجاة

"أنا بستناك وليلي شمعة سهرانة لليلة حب"

علشان مرايتك

قلبها يفضل مجمل

كل حته من ملامحك.. تسأليها

"مرايتي.. قولي لي يا مرايتي

حبيبى مجاش ليه دلوقتي"

أنا كنت واقف جنب منك بسمعك

لكني عارف إن بُكرة مكنش لينا

عشان كدا.. أول ما بيجيني الشتاء

بابقى كأني كنت لسه من يومين

تحت المطر

ماسك إيديكي.. بودعك...١

الوقت رهان..

والساعة في إيدك كام دلوقت..؟

والليل لو طول من غيرك

مش يمكن تسرقني الوحده

وتجينى براحتك تلاقيني..

على بُعدك عنى إتعودت

الساعة في إيدك كام يعنى..؟

ومعادنا مجاش على بالك لية

لو ينفع بُكرة يرجعني

هاكتب لك نفس كلامي في شعر

يمكن تفتكرى الوقت بجد.. وانتي بتقريه...!

حُط حبرك ع الورق واكتب.. ألم

إكتب قصايد تتحرق

وإكتب غناوى.. تتركن

في الدرج عبى الذكريات

سيب الف معنى

بيجرى علشان.. يتسجن

في حضن بُكرة سيب.. كلام

سيب رسم ع الجدران.. يدوم

خطین بلونك یا علم

وإكتب حكاوي

تتنسى ويا الزمن

إكتب حِكم..

يفهما شبح الواد...

صاحبنا اللي إتقتل

واتسمى بإسمه شارعنا

بين الناس وبينه

لسه الشوارع ناقصة شهداء

مع إنها..

مفهاش كفن...١

أدى كام سنة..

والأسئلة مترصصة وبتدارى عنى الأجوبة

في عنيكي مقريه الحكاية

لو جاية خايفه من الطريق

نبقى إتهزمنا في تجربة

ورميتي روحنا في وسط سكه بدون هدف

شوفى كام سنة ع البحر بنوشوش صدف

ونشهد الموجع الوعود

ونرصها الأحلام ما بينا ونبنى م الرمل البيوت

فمتضعفيش.. وتخلى حبة ريح تهد اللي إتبني

في الكام سنة...!

عن إيد في وقت سلامها

بترتعش م الخوف

عن كل وهم بينتهى بكلمة

ظروف…!

دورى معايا في قلبك

عن بواقى حنين لبعض

يمكن في وسط التوهه

يظهر لك طريق

فترجعيني للدفا

وتحققي من بين وعودنا..

أهم وعد...!

<u> ۲۳</u>

يا كل أحلامنا البريئة

يا كل ثانية بتتولد...

تخطف وراها العمر خطف

زى ما بتخطف دقيقة من دقيقة

يا قلب معجون بالأمل

العمر قصة

واللى مكتوب لك يادوب

هو الحقيقة...!

البنت..

قعدة بتنتظر بُكرة

بُكرة اللي جاي

ولاغيها م الحسابات...١

أنيا بكتب شعر

وكإني لأول مره بقول من قلبي..

أنا بكتب شعر

وكأنها أخر مره هاكمل فيها قصيدة

والدنيا بتضيق جدًا قدام عيني

وكأن الجنة مابيني وبينها دقيقة

وعمايل فاصلة ما بيني وبين النار

وكأني اخترت نهايتي تكون على ورقة

والورقة بتتلوث حبر

والحبربيكتب أخرحبة روح ساكنيني

وأخر حبة صبر

وكإني بجد مابيني وبين الموت..

كام خطوة

أنا مش زعلان..

اصل أنا ماعرفتش مره في عمري

إيه طعم الفرحة

وكتير كان نفسي

وكنت بقولها بعلو الصوت

ڪان نفسي بجد...

لكن أحلامي اللي إتمنيتها في عمري

قتلها الوقت

ودفنها في سابع أرض..

إحساس بالموت...!

بعترف لك

إني مش غلطان في حقي

وإني صح..

وإني لما عملت قلبي بيت يلمك

كنت صح..

كنت شايفك بنت

بتزينها البراءة

شُفْت نفسي لما شفتك

شاب مفطوم ع الجراءة

عشت عشقك

عشق صح

وكنت صح..!

كنت صح

لما كنت بليد في ترجمتي لغبائي

وإشتياقي كان.. سايقني

عمر قلبي ما شال في قلبه

غير غلاوتك

وعمر ما بعدك ضايقني

دا عشق صح

وبعترف لك..

إنى مش غلطان في حقك

وإني لما طردت حبك

خرجتي بره

أصل مسامحتش في مره

وكنت صح..!

ضحكي كان ضحك إنكسار

دمعي صاحب كام نهار

جريى ورا كام واحده.. غيرك

وإندماجي في درو فلاتي

عمره ما برد لي نار

أصل مش بإيدي إن أشطب ذكرياتك من حياتي

من قصایدی

من ليالي قمرها كان شاهد عليا

من شوارع نص عمرى مشيته فيها

من غناوي الميموري كان جواه شايلها

حفظها قلبى

لأجل قدامك أقولها

بس ماعرفتش أقولها وبعترف لك

حتى نسيانك.. هزار

الحاجات دي

عايزه واقفه وعايزه وقت

وبرده هافضل أقول؛ يا عالم

امتى هاحلف إني فُوقت

امتى نسيانك في مره

يبقى صح...١

قلبي ساقني

زي ما ساقني لطريقك

قولتي دوقني شربت مُرك من وريدك

مش فايق لك

عندي جرح في روحي منك

نفسي ألمه

نفسي أهدك طوبة.. طوبة

نفسي نوبة

بس خايف برده ألمه

نفسي غيرك جوا قلبي

يبات.. يربع

يبقى قلبي لقلبه دار

وأعترف لك

إن غيرك خد مكانك

راح زمانك

وإن نسيانك..

لأول مر*ه* صح

ومش هزار...!

محتاجين

محتاجين..

قلبين جداد

ماسكنش فيهم أى ١

محتاجين..

نرجع قوي لأيام زمان

وتدوخ عيونا من جديد

ونهز راسنا بـ "أه" و "لأ"..

فلان دا شافنا وإتكسف

وفلان دا "لأ"..

الناس كُتار..

والجو برد وجسمي مني بيتنفض

وأنا كل ما أدخل جوه حضنك..

بترفض

أنا كل ما أبعد ثانيه عنك

مش بشوف

سارقنا خوف

ويجوز في قلبك حاجة عني

وسواس و واخدك بين بينين

هاشوفك امتى..؟

قولي فين.؟

من بين شفايفك من شوية

وعدتي وعد

وسنين سنين عمال بقول؛

هنكون لبعض..!

خبط لي قلبك ع الكتب

خلاني أشوفك في الورق

عنوان لدرس بيبتدي وقت الرجوع

أنا قُلت فيكي كلام كتير

أيام ما كنتي بتحكي عني

بتوصفى إزاي إتقابلنا

(بعت لى نظرة.. بعت له

بعت لي همسه.. سمعت له)

نظرات صحابك مش فاهمها

صوتك "كمان" مبقاش حقيقي

فجرتي فيا الأسئلة

ليه بتسرقي فرحة عيوني..؟

شبابيك عيونك

واقفه ليه.. بينك وبينى؟

والليل سرق منك براءتك.. والسلام

خلص الكلام

من كل قواميس اللغات

والوقت.. فات

وأنا لسه واقف مطرحي مستنى أشوفك...١

ضحکة فردی

نفس الطريق..

نفس المسافه اللي بينا

والخنقه والضيق

والذكريات الحاضرة م الفصل الأخير

وشربة الميه من النيل

ووشوشة الصدف

والفرق أكبر من زمان

الفرق في الأمنيات والحلم..

ناس تانية غير الناس

وشهود جداد

غير اللي شافونا في أول الصدفة

بنرمي نظرة لبعض

ضحكة فُردي

من بين وشوشهم عدت تجيب ضحكك

إشاراتنا تتقابل

تردني مني

وتاخدني لعنيكي

وقت غير الوقت

يجمعنا ليه تاني..؟

لما إنتي رفضاني..

ليه عاشقه ضلي وخطوتي..؟

ياريت تحلّي عن سمايا وسكتي

محبتي ليكي

كشكول حصص

نطورني ياما يمين.. شمال

علمني أجمع في اللي شاري

واطرح مني المحال

لو تقبليها..

بلاها دي القصة

فاكرهيها

وإكرهي الصفصاف وضله

سور المدرسه اللي دارانا

إكرهي ساعة لقانا

والوشوش الشاهدة ع الحدوتة

وإكرهي التوته

والوليه اللي جابتني.. عشان عيوني تشوفك

إكرهي خوفك وجسمك اللي بيتنفض لما تشوفيني

وإكرهيني

نفس الطريق

نفس المسافة اللي بينا

وبتتخلق صدفة تقابلنا

مع إن روحنا بتدارينا

وبنبني للمجهول ماضينا

يجمعني بيكي إزاي

نفس الطريق...!

بلاش تعبى القلب بالحواديت

السماء كام لون..؟

والأرض كام طبقة..؟

أنا لسه مش راضي

عن أي فكرة

فبلاش تعبي القلب بالحواديت

وتعشميني بحلم مش لينا..١

أنا كنت قادر أسمعك وإنتى بتحكينا

على كل سكة معشمه ترابها

نمشى عليه تانى

وكفاية.. خلى عنيكي فكراني

يمكن أشوفك وإنتي بتعدي

وبتحسبي المسافات

تساويها بامبارح

لا أنا كنت جارح

للعيون المفتوحين على حلمنا

ولا كنت نور

السماء كام لون..؟

والأرض كام طبقة..؟

أنا لسه مش راضي

عن أي فكرة

فبلاش تعبي القلب بالحواديت

وتعشميني.. بحلم مش لينا...!

تنكريني٠٠٠

تنكريني..؟

طب أمانة عليكي قولي بجد

ناكره ليه..؟

أصلي مش ناكر ملامحك

حتى إسمك

شكل جسمك

ليل نهار كلك على بعضك قبالي

بفتكر أيام عنيا فيها شافت

يجي مليون حاجة منك

بامشى بالماضى شويه

حبتين لسنين فاتونا

إمشي زيي وفكريني

مين ناديتهم

مين بعمري إشتريتهم

أصلهم كان أوطى منهم

نشتريهم.. ويبعونا..١

زيدي بس الطينه بله

أصل أنا محتاج مزله

عشان أحدد

قد إيه لازم اسبك

واللعن الصدفة الغبية

وأطحن القلب اللي حبك

حب يوجع

شاف بلاوى القلب شالها

شاف وساكت

قُلت يمكن حبه طايشه مسيرها تعقل

هوا ديل الـ . . . عمره في يوم بيرجع .. ؟

طاب دا مليون واحده زيك

بعد ما إتعشقت ونكرت

جالها يوم.. والتاني ماتت.. ا

قولي قولي

أيوه محتاج لك تقولى

أصل حبيتك حقيقى

ياما سمك بل ريقي ولسه عايش

ناكره ليه..؟

ناكره واحد

كانت عنيكي القبلة ليه

كان بيحلم يجمع الفرح لمداكي

كل همه إن تعيشيه

ولاً لما تعبتي.. كان أول قريب

خوفه كان عمال يطيب

يغسل الوجع اللي ماليك

من دموعه

ياما سد رضاكي جوعه

شيلتي نفسك م الحكاية..؟

دي النهاية بتنكريني..؟

طاب أمانة عليكي

قولي بجد..

ناكره ليه...؟

الرقصة الأخيرة

حاولت أهرب م الحقيقة

مقدرتش أهرب من شعوري

علشان لأول مره أحس بأن دوري

أصبح قريب

وإني لازم أرقص الرقصة الأخيرة

وأرقص الأيام معايا

أزق أحلامي الكبيرة لأعلى حد

وأدوس بجد

على أى فكرة غبيه بتسوقني لجنون

معدش حضن الطيبة بيدفى اليتيم

فيه ناس بتحلم بالأمان والستر

وناس بتحلم تلقى فرصة

باب السماء المفتوح.. مجروح من الحواديت

مراسيل بتوصل في الميعاد

طلبات تغطي السماء والأرض..١

سامحيني يا أم القلب كان مليان صفى

مقدرتش أخدك.. للدفا

كان غصب عنى غربتى في أرضى

والود كان ودي

نزرع سوا ونحصد سوا

لكنه صار حكم الهوى

طُّوح شراعي بمركبي لبعيد

صعبان عليا يجيني عيد

وأنا لسه بهرب في الخفى

وبمد إيدى لبُكرة تترد في ساعتها

مين اللي دبل ورد جناينا..؟

سقط ورقنا من قبل الأوان..؟

خماسين رياح الحيرة.. حايرة في السماء

وأنا روحي طايرة.. إنما جسمي هنا.. ع الأرض

بضحك وضحكي بيتخطف مني

مين اللي خلى عنيا تخيلني

وأتباع أونطه بغمزه مخفية

متفكريش يا حبيبتي فيه زيك

إنتى اللي باقيه في وسط كام بكرية..!

يا ضحكة الإنسان في كل نهار

إنتي القدر والصبر

وإنتى المفر

توصيله للراحه ووصله من العلاج

لو تعرفي بإنك نجاه

هتفارقي وش الناس..؟

ملعون سكاتي وشكوتي..

ولا عمري أنا حلمت بمُحال

كل اللي روحي بتطلبه.. شوية أمان

أتغطى بيهم.. لما السماء تبكى شتاء

ويبكينا الشتاء بالبرد

كل اللي روحي بتطلبه شوية..!

فيه ناس بتطلع فوق كتاف الناس

وتحت منهم إتمددت أجساد

وانحنى الظهر اللي كان مسنود

لكنه إنداس

الناس في ساعة الزحمة بلا رحمة

ويساوى كام

اليوم في سوق العمر متسعر

وإحنا في مزاد

هنعبى روحنا بأمنيات

هنجوع قوي

يمكن نموت م الجوع

إنتي وأنا والناس في الطريق

تفاريح بنضحك في الوشوش

يطلع ما فينا لبعضنا مغشوش

مين اللي يقدر يخلعك مني

يغير طعم حلقي المر..

مين اللي يقدر يخلعك مني

يداري عليا ضلة صبر..

ولما الدنيا تطرحني

يغسلني

ويضمن لي دخول القبر...!

ثورة

(ورا كل شباك ألف عين مفتوحين)

وعيال أبالسه منمردين

متمرنين ع المشي فوق شوكك

أنا كل جيلي إنداس مع ترابك

وإنتي الغريبة في وسط بلاويكي

حامي وحرامي وفرقة ع الصفين

حاولتي يوم..

ترمي السلام على مجروحين..؟

يمسح شروقك طل نص الليل

جسم الغلابة الغرقانين في الهم

المطحونين في الويل

غرقانة وسط الأغنيات..

والشعر.. والسيما..!

كباريه وكرباج، وهدت حيل

وقِلة أصل ومرمطة قيمة

مصريه ولاً مصر..

ولاً إنتي بنت لئيمة..؟

سايق عليكي الورد م التحرير

من قلب مستشفى

من اسكندريه وقنا وأسوان والسويس

سايق عليكي البكاء من طفله مش فاهمة

من روح في سابع سماء توقفي التهييس

عشمان جنابك بقى

تسقينا من نيلك

الميه متسرطنه، ولاً؟

شيلنا اللي كان.. علة

النيل هيصفالنا والناس هتصفالك

عشمان جنابك بقى تخدينا في وصالك

ومتقطعيش حبل الوريد بينا

حلم البطايق في الجيوب...

عِزه

مش بس كام حرف وخلاص... كفاياكي

حلم الولاد المفتونيين بيكي...

غَزة

وتقطعي "أم المعاهدة" وتطردي كنتاكي

حلمى في مره ترجعي لأصلك

أم الحضارة وكلنا عارفين

ضمينا يا أم النيل والأهرامات والمنصة

إستوعبي الفكرة.. وإفهمي الحصة

إحنا اللي نستاهلك.. مش قلة مندسة

إحنا الأجندة اللي إبتدت بإسم الله وبيكي صوتك في صرخة أم.. على إبن مات فيكي قلبك ونبض جريح مطحون في يوم ثورة

لو كان لقانا في الميدان كان عندهم عورة

أرجوكى إرمي من ورا ضهرك.. أيادينا الخفية

وإرمي حروف كلمة ننطقها..

سلمية..

سلمية..

وإرمي السلام وإطلعي من شرنقت حُره

وإنسي الجمل والكورة والصناديق

يمكن ساعتها..

تكملي الثورة..!

مكنتش قد تجريحك

نهارك.. زى ليل عشقك عديم اللون.. ١

ومين هيقول..

وأنا اللي كنت بحتاج لك

وشايل في الجراب ياما

وكنت الحاوي في مداكي.. الف كتير

يخدني هواكي على بحرك أكون سواح

وأرسي شفايفي على خدك

وأبوسك بوسه قبل ما أنام

واضمك بين دراعاتى..

تروح مني الهموم وأرتاح

أنا اللي إتلخصت روحي..

في صفحة من كتاب عشقك

مكنتش قد تجريحك

زرعت الخير على جبينك

غسلت همومي من نيلك

وكان لازم أغنيلك

وأنط الحبل علشانك

عملت كتير من التفاهات

لفيين وخداني وأنا أرضي كانت أرضك ؟

ما بين خطوة بتمشيها..

وما بين قصة

طلعتي إنتي البطل فيها

ذاكرتك الف مره و قُلت؛

محدش غيري هايعدي

في نتيجه إتعلقت ع الحيط

بترمى في كل يوم حكمة

وبتبين تاريخ لينا

ما كنتش مره بتردد

ولما قُلت أشوف بكرة

لقيتنى الكلمة مكتوبة

على ورقه بدون مواقيت

ويومها ما كنش متحدد...١

تشبهينى

ولا تشبهيني في أي حاجة

لا في الملامح..

ولا حتى في الدم اللي سارح في العروق

أصل إنتي سكة

وأنا سكتي عكس إتجاهك

ونظرتي لفوق

بالرغم من إنى ضعيف

قدام شريط الذكريات

لو لف مره قصاد عيوني

فكرني بالعمر اللي عدى في صُحبتك

تلاقيني كاره حتى أيام الطفولة

لمت زمايلي وإحنا لسه صغيرين

طالعين نعاند مستحيل..

بالمستحيل..١

مافضلش منك حاجة جوايا

غير هو إسمك في البطاقة

ونسينا بالغصب إنتمائنا

سلمنا من أول مواجهة

ماعدتش فارقة..

لا معاكى فارقة

ولا بيكي فارقة..!

إشتد عودي..

رسيت على كتفي الهموم وأنا لسه شاب

عداني قطر الأمنيات..

وسرقني مني

سلمني كل ما فيكي للأيام تِهيني

إتفرفط العمر اللي محسوب بالمعاد

ليت بكفي حاجات

ونسيت حاجات

كان نفسي تصدق أغنيات

وجعت دماغنا وضللتها

وللنهاردا.. لساها فاضلة..

وبتتعاد...!

یا حبیبتی

أهرب من مين..؟

إذا كنت أنا هاقدر أهرب منى

يبقى اللي ساكني هايهرب بيا لفين..؟

للفرح..؟

ماهو حتى الفرح ناسيني بقاله سنين

للجرح..؟

الجرح إحتار ويايا وهج.. لناس تانين

يا حبيبتي شوفي لي طريقة تحل مسألي

يا حبيبتى أنا روحي بتلجألي وببان مكسور

أنا حتى بيتهيألي حاجات واحسبها أحلام

مستنى الحل..

الشمس بتيجي وبتروح

وأنا نفسى في ضلك

لحظة ما اتعب

أسند جسمي عليه وأنام

يا حبيبتي أنا زعلان قوي منك

ولا عادة عينك بتناغي

ولا قلبك زي زمان بينادي

وقفلتى الشباك عن عيني

أنا بفضل مستني ساعات

يمكن تناغيني

وتشاوري عليا وترمي كلام

إشاراتك ليا إتقطعت

هو أنا زعلتك مني..؟

ما هو غصب عني.. الوقت سرقني

وضايقني سكوتك.. على بُعدي

والصدمة الأكبر لما لمحتك..

بتعدي بروحك على روحي.. ولا سلمتيش

أهرب ولفين..؟

أنا ياما دعيت في صلاة العشق إنى أكون لك

وندهت عليكي تقولي أمين

ولا قولتيش...١

الخوف ريبوت كنترول

الخوف..

ريموت كنترول

بيڪعبلني فخ روحي

مع أول أمر شعاعي بيطلع منه

ويترجم فيا إشاره يادوب محسوسة

الخوف مربوط جوايا لكنه الوالى

يتحكم فيا بضغطة وسواسي

أتلم يبعترنى

أستسلم ليه..

فايسيبنى عشان النور إتسحب

من تحت الباب

من بعد ما شق الليل نصين

ما أنا أول واحد يفزع نومه ويهرب منه

أتستحب على أطرافي لغاية ما أوصل للنايمين

أحضن أحلامهم

أستتشق أنفاسهم وأطمن..!

مقدرش أتصور نفسي لوحدي

مع إني بحب الوحدة وأحب القعدة في جنب

باعشق شخبطی فے کراریسی

إفتحي كراريسى يا ست الحسن وشوفي

دا كلام ملانى القلب إياه

وغزلت حروفه عشان تقريه

لما قابلتيني

وضحكتي في وشي

وبعتي النظرة تقولي بدالك وتفهمني

خطيتى حروف أسامينا على الجدران

ورسمتى القلب

ورسمتي السهم

وكتبتي في أول ورقة الوعد

جبتي لي عنيكي الدنيا عشان تاخديني

واعشها وتمتلكيني..؟

تبقي إنتي وخوفي عليا..١

مش كان أحسن لك يربط بيني وبينك

أول حرف في أول ورقة وبس

تبقي إنتي النور

بنت الشمس الشمعة الدهبي

نارك حر أغسطس

دخانك ريحة دفي فبراير

دوبانك يبقى في عشقي

ورقصك يبقى تجاهي

تتمايلي عليا وتتسندي تصدي الدنيا اللي معنداني

وعداني وسايبه الوعد لمين..؟

ولمين الشعر هايطلع مني..؟

إستني شوية..

إدينى الفرصة أعاتبك وأنا مطلوق

قبل الخوف ما يغير فيا حاجات

بالليل مرهون

والليل لو خش عليا ماليش أعزار

دنيتك اللي إتسحبت إليها مع التيار

مرتحتش فيها

لوينفع..

سكيها في وشي

أرحم لي أعيش براها

هرتاح لو روحك صاحبة روحي

أنستها في رحلتها اليومية

أنا م الفجريه بحايل فيكي

ومنتيش عايزه تردي..١

عيزاني أعملك إيه تاني..؟

علمت كفوفك تسليمه

وإنتي تملى

خطاویکی اله کانت لطریقی

معدتش بتوصلي

معقولة..١

معقولة يا أُمي..!

أنا جاي لك دليني

لو عندك أي كلام هايفيدني قوليه

إديني نصيحة

حرامية وسرقت منى القلب وهربت

حسيت بالغرية..!

محتاج لإيديكي تلف عليا بقوة

تدارینی فے حجرك من تانی

فاكر تحذيرك

وشوشتك ليا في عز شبابك

كنتى الأبلة

وأنا كنت التلميذ الشاطر

تدرسي ألاعيب الستات وتفهميهالي

رُديني لضل كفوفك وإحميني

خايف م الشمس تجور على لوني

أتغير أكترم الأول

خايف م الخوف

والخوف حارس على خطاويا ومتشعبط

أتمشى طريق..

الدم بيهرب في عروقي

الفجر يهديني

خایف من تانی وعطشانك

ولا عارف أفرق بين الضعف وبين القوة

الدنيا الحلوة من المرة

والدنيا بتاعتي من أي فصيلة..؟

ترحيلة مع الأوجاع

والباب مفتوح

السماء بتمطر تصبيره

وأنا لسه بدوخ من ضغطة وبتخض

ولا عادت طاصة الخضه بتنفعني

مّيتها في حلقي بتترد

أنا مش مجنون...

لكنى بحس بأعراضه وبتخبط

بتلخبط في التفاصيل

أفهم بالأمر وبالإشارات

تابع للدورة و للدايرة

رابط بيني وبين النيل والشط.. العرافة

إحتاري معايا شويه ياست

إضربيع الرمل وشوفي في أطري

فُكيلي المندل

بتسلم للخوف يكسرني

يطلع من الطفل يبكيني

النيل يغسلني

حاوريني ولو بالهمس

غمضي وإرقيني

فیه عیون حاسدینی

خمْسي في السر

إتاوبي كمان غمي عيوني

شوفي بدالها العرق النازل ع الخدين

م البير الجسدي

طعمه المالح

السر ما بين روحي وبينها.. رابطه الإحساس

حبة أخطاء

جرياني في قلب الحارة

قعدتنا نبص على الرايحين

نتونس سوا بوشوش الناس في العصرية

شوقنا المتكرر للأفراح

خوفنا الواحد.. والليل جاى لينا

إستنى يا ليل

أنا جاى لك من تانى

وهسلم نفسي

بس أمانة عليك تترأف حالتي

كوابيسك مطره بتنزل تكتم نفسى

وسناني تكز تكز ويطلع صوتها المزعج

فاتصحى الكوابيس النايمه

تقلق فيا الخوف، من تاني...!

أنا بعينه

بحق إنك عشقتي نهارك وإنتي فيه جنبي

بحق إنك عليتي ع القمر بيا

وشهدتي النجوم والزهرة وعطارد

بحق إنى

بقيت تابع لخيلاتك

وبمشي في سكتك أعرف

وجودي ومطرحي في ذاتك

ما أنا الأول..

وأنا بعينه اللي ياما حلمتي تبقي له

وأنا بعينه اللي ياما في فرشتك سافر

وأبوابك فتحتى له..١

أخدتيني في حضنك

ألف ليل ورا ليل

شفتيني في عز العمر..

حلم جميل

ما أنا الأول..

وأنا القعدة في جناين مصر والفرحة

وأنا اللقمة اللي ياما إتقسمت بالنص..

في الفرحة

أنا شهور الحداد عندك

شهور عدة

وأنا الوحدة اللي عشتيها سنين عافية

وأنا القلب اللي رجلك جت له يوم حافية

وحضني..

هربتي من حضني

ضعفتي رجعتي من تاني

ونيلي ڪان عسل جاري

سكرتي ودقتي بشفايفك

بألف طريقة مختلفة..!

أنا الورطة اللي سيباني السنين ليكي

وبتسند على الذكري عشان أقدر أعديكي

أعدي منين..؟

وأنا المسجون في جرح وحلم مكملشي

وبتخفي في روحي كتير

وبتخفى في ليل ضلمه

وبتخفى في برأة طفل مكبرشي

وبندم غصب على سني

ولساني بحاول أفوق من الكوابيس

وجيباني لـ ورا الأحاسيس

ما أنا اللي كتبت فيكى الشعر

حبيتك..

وعلّيتك..

وكانت نيتي صافية

وسندتك وعديتك

في وسط الزحمه فوقتك

رجع وعيك على الكرسي

وكنتى بتنطقي إسمك

وبعدين تنطقى إسمى

وتنسي الناس حوالينا

وتنسي تقدري تحسي..

حاجات وحاجات

لواحد كان في يوم أول

ولو يطول ما بينا سكات

منیش ساکت..

كفايه عليكي عدى سنين وأنا ساكت

لا يوم توبتي.. ولا عقلتي

أنا الفكرة اللي جت لك

وإنت بتذاكري

وشخبطي حروف إسمي في كشاكيلك

ولونتي القلوب لوني

وأنا الحلم اللي لسه بتحلمي يجيلك

أجيلك ليه..؟

ما علمتك تداري عليا الاعيبك

وتقوي عليا بعيوبك

عملت عيوني علشانك

ستاير كعبتك فيا

واقفلك صلب

تطوفي وتشربي مني

وتروي القلب

تحجي وتغسلي روحك

وسيبتك تطلعي جبلي

ولما زمامي زان كفك

بقيت بتزل..١

في عز ما كنت أنا في ضهرك

رجمتيني..١

وزي ما أكون سبب طهرك

رجمتيني..١

وأنا اللي سامحت كام مرة

وعديت لك بدال الغلطة ميت غلطة

أقولك إيه..؟

لاً كانت حجتك نافعه

دی حجة حرام

منيش محرم

ولا سلم بيوت الناس دي

كانت كعبة للعشاق

ولا اللعبة دي

كانت صح م الأول

ولا عرفتش

أؤدى مناسك حب كان لحظات

ولا إنتي حاولتى تغتابي

وتحكي تقولي؛ كان نفسك

أكون أول.. وأكون أخر

ولا قدرتيش تزيدي خطوتين قدام

وتداري ورا بابي

ونرجع تاني زي زمان

تعيشي في حضني.. ونسافر...!

نَص فاجر · · (سيناريو - مشاهد واقعية)

(1)

عيب المؤلف...

إنه فضل قصته تبدأ في شقة

كان يجرى إيه..

لو وسع الدايرة شوية

ولم كل الـ؟

مش عدل أبدًا

يخنق الحدوتة جوه أوضة نوم

علشان سعادته المكتشف

لجمال جسد بنت اللذينَ

اللي يادوب دورها في كل القصة

تطلع.. ع السرير

فالفيلم يطلع بالإيراد

ينهض على إيده إقتصاد

نهضته اللي بصحيح

"نُص حباية فياجرا"...!

الحكمة من إن المؤلف

يتقمص الأدوار تباعًا

هو إنه يدرب الناسع الفضيلة

ويعود الناس على حبة حاجات

من اللي في السيناريو

مش ذنبه إنه بيتفهم

حسب هوانا وإنتمائنا

السينما.. ناس

لحظة ما بتضلم

الشاشة بتشد إنتباه كل الحضور

لكن...

بيهرب منها جوز

راكنين على أخر كراسى المسرح

في أبعد نقطه بالنسبة لمسار الضوء

الفيلم شغال.. من دقايق

وهما برده شغالين...!

غلطة المخرج في إنه

ساب بتاع النور يضلم "كادر" فاضح

مش فلسفة ولا عادة م العادات

إن الرذيلة بتبقى في الضلمة

مش عيب تبين في الحاجات

مادام مؤلف قصتك عدي الحدود

وكسر قواعد مجتمع

بنُص فاجر

فيه عقدة النقص، غلبت عقدة الجمهور...!

عيب البلد دي

إن إحنا بعد الثورة بنادي الإمام

ونفسنا في عمر الفاروق

مع إننا..

لحظة ماتعلي أصوات المأذن بالأذان

ولا أكنِنا سامعين...!

محمد ممدوح خيرالله

كاتب، و مؤسس ورئيس تحرير موقع ورقة الألكتروني.

للتواصل..

- Www.War2h.Com
- Www.Fb.Com/Mohamed.M.Khir allah
- Www.Fb.com/Writer.Khirallah